

Perdana Menteri lancar Jelajah Pendidikan Keluarga Malaysia

Astro Awani
Mac 6, 2022



Perdana Menteri, Datuk Seri Ismail Sabri Yaakob melancarkan Jelajah Pendidikan Keluarga Malaysia bagi memberi peluang kepada pelajar yang gagal memasuki universiti. - Foto Facebook/Mahdzir Khalid

SEGAMAT: Perdana Menteri, Datuk Seri Ismail Sabri Yaakob melancarkan Jelajah Pendidikan Keluarga Malaysia bagi memberi peluang kepada pelajar yang gagal memasuki universiti.

Kerajaan menyasarkan kira-kira 50,000 pelajar memasuki universiti melalui hasil jelajah di 50 lokasi yang melibatkan 90 parlimen tumpuan.

"Penilaian kemasukan ke universiti adalah berdasarkan kepada penilaian yang dibuat oleh komputer apabila mereka memohon UPU.

"Jadi status mereka, kedudukan mereka sama ada berada di pedalaman misalnya tidak dijadikan asas dalam membuat keputusan.

"Oleh sebab itu, kita membuat program ini dan hasilnya adalah ramai kalangan pelajar tersebut berjaya mendapat tawaran masuk ke universiti," katanya dalam sidang media selepas majlis pelancaran Jelajah Pendidikan Keluarga Malaysia di sini pada Ahad.

Ismail Sabri berkata, program itu sebelum ini dikenali sebagai Jelajah Pendidikan Bumiputera yang dimulakan sejak tahun 2016.

"Kerajaan Barisan Nasional (BN) tumbang pada 2018, dan Pakatan Harapan (PH) kemudian memberhentikan program ini.

"Walaupun bertukar kerajaan, tetapi kerana COVID-19, kita tidak mampu untuk teruskan ketika itu, tetapi kita mulakan semula sekarang," ujar beliau.

Setakat ini, seramai 160,374 pelajar telah berjaya memasuki institusi pengajian tinggi awam dan swasta, serta agensi pendidikan tinggi melibatkan Pendidikan dan Latihan Teknikal dan Vokasional (TVET).

Jelajah Pendidikan Keluarga Malaysia dijangka akan dimanfaatkan pelajar lepasan Sijil Pelajaran Malaysia (SPM) 2020 dan 2021.

"Yayasan Petronas juga akan menyalurkan sumbangan bagi membantu pelajar dalam program berkenaan.

"Selain itu, Majlis Agama Islam Wilayah Persekutuan (MAIWP) akan memberikan bantuan pelajaran kepada pelajar dari keluarga miskin dan asnaf," katanya lagi.

Justeru, Perdana Menteri mengalu-alukan bantuan dari mana-mana yayasan dan agensi bagi menjayakan usaha dalam memastikan pelajar ke menara gading.